

傷寒來蘇風

論註(三)

傷寒論註卷之二

南陽 張機 仲景原文

慈谿 柯琴 韵伯編註

崑山 馬中驊 駟北較訂

麻黃湯症上

太陽病頭痛發熱身疼腰痛骨節疼痛惡風無汗而喘者麻黃湯主之

太陽主一身之表風寒外束陽氣不伸故一身盡疼。太陽脈抵腰中故腰痛太陽主筋所生病諸筋者皆屬于節故骨節疼痛從風寒得故惡風風寒客于人

則皮毛閉故無汗。太陽爲諸陽主氣，陽氣鬱于內，故喘。太陽爲開，立麻黃湯以開之，諸症悉除矣。○麻黃八症：頭痛發熱惡風同桂枝症，無汗身疼同大青龍症。本症重在發熱身疼無汗而喘。

本條不冠傷寒，又不言惡寒而言惡風，先輩言麻黃湯主治傷寒，不治中風，似非確論。蓋麻黃湯大青龍湯治中風之重劑，桂枝湯葛根湯治中風之輕劑，傷寒可通用之，非主治傷寒之劑也。

脈浮者病在表，可發汗。麻黃湯脈浮而數者，可發汗，宜

麻黃湯

前條論症。此條論脈。言浮而不言遲弱者。是浮而有
力也。然必審其熱在表。乃可用。若浮而大有熱。屬藏
者。當攻之。不令發汗矣。若浮數而痛偏一處者。身雖
疼。不可發汗。

數者急也。卽緊也。緊則爲寒。指受寒而言。數則爲熱。
指發熱而言。辭雖異而意則同。故脈浮緊者。卽是麻
黃症。

脈浮而數。浮爲風。數爲虛。風爲熱。虛爲寒。風虛相搏。則
洒淅惡寒也。

脈浮爲在表者。何以表有風邪。故也。邪之所湊。其氣

必虛數本爲熱而從浮見則數爲虛矣風爲陽邪陽浮則熱自發數爲陽虛陽虛則畏寒凡中風寒必發熱惡寒者風虛相搏而然也

諸脈浮數當發熱而洒淅惡寒若有痛處飲食如常者畜積有膿也

浮數之脈而見發熱惡寒之症不獨風寒相同而癰瘍亦有然者此浮爲表而非風數爲實熱而非虛矣發熱爲陽浮而惡寒非陽虛矣若欲知其不是風寒當以內外症辨之外感則頭項痛身痛骨節痛腰有痛非痛偏一處也外感則嘔逆或乾嘔不得飲食如

常如此審之有畜積而成癰膿者庶不致誤作風寒
治則舉瘡家一症例之治傷寒者見脈症之相同皆
當留意也

瘡家身雖疼不可發汗汗出則瘳

瘡家病與外感不同故治法與風寒亦異若以風寒
之法治之其變亦不可不知也瘡雖痛偏一處而血
氣壅遏亦有徧身疼者然與風寒有別汗之則津液
越出筋脈血虛攣急而爲瘳矣諸脈症之當審正此
故耳

脈浮數者法當汗出而愈若身重心悸者不可發汗當

自汗出乃解所以然者尺中脈微此裡虛須表裡實津液自和便自汗出愈

脈浮數者于脈法當汗而尺中微則不敢輕汗以麻黃爲重劑故也此表指身裡指心有指營衛而反遺心悸者非也身重是表熱心悸是裡虛然悸有因心下水氣者亦當發汗故必審其尺脈尺中脈微爲裡虛裡虛者必須實裡欲津液和須用生津液若坐而待之則表邪愈盛心液愈虛焉能自汗此表是帶言只重在裡至于自汗出則裡實而表和矣寸口脈浮而緊浮則爲風緊則爲寒風則傷衛寒則傷

營衛俱病骨肉煩疼當發其汗也

風寒本自相因必風先開腠理寒得入于經絡營衛俱傷則一身內外之陽不得越故骨肉煩疼脉亦應其象而變見于寸口也緊爲陰寒而從浮見陰盛陽虛汗之則愈矣

緊者急也卽數也緊以形象言數以至數言緊則爲寒指傷寒也數則爲熱指發熱也辭異而義則同故脈浮數浮緊者皆是麻黃症

脈法以浮爲風緊爲寒故提綱以脈陰陽俱緊者名傷寒大青龍脈亦以浮中見緊故名中風則脈但浮

者正爲風脈宜麻黃湯是麻黃湯固主中風脈症矣
麻黃湯症發熱骨節疼便是骨肉煩疼卽是風寒兩
傷營衛俱病先輩何故以大青龍治營衛兩傷麻黃
湯治寒傷營而不傷衛桂枝湯治風傷衛而不傷營
曷不以桂枝症之惡寒麻黃症之惡風一反勘耶要
之冬月風寒本同一體故中風傷寒皆惡風惡寒營
病衛必病中風之重者便是傷寒傷寒之淺者便是
中風不必在風寒上細分須當在有汗無汗上着眼
耳

太陽病脈浮緊無汗發熱身疼痛八九日不解表症仍

在此當發其汗。麻黃湯主之。服藥已微除。其人發煩目
瞑。劇者必衄。衄乃解。所以然者。陽氣重故也。

脈症同大青龍而異者。外不惡寒。內不煩躁。耳發于
陽者。七日愈。八九日不解。其人陽氣重。可知然脈緊
無汗發熱身疼。是麻黃症未罷。仍與麻黃。只微除在
表之風寒而不解。內擾之陽氣。其人發煩目瞑。見不
堪之狀。可知陽絡受傷。必逼血上行而衄矣。血之與
汗異名同類。不得汗。必得血。不從汗解而從衄解。此
與熱結膀胱。血自下者。同一局也。

太陽脈從目內眥。絡陽明脈于鼻。鼻者陽也。目者

陰也。血雖陰類，從陽氣而升，則從陽竅而出，故陽盛則衄。陽盛則陰虛，陰虛則目瞑也。

解後復煩，煩見于內，此餘邪未盡，故用桂枝更汗。微除發煩，是煩于外，見此大邪已解，故不可更汗。仲景每有倒句法，前輩隨文衍義，謂當再用麻黃以散餘邪，不知得衄乃解，句何處着落。

傷寒脈浮緊者，麻黃湯主之。不發汗，因致衄。

脈浮無汗者，當用麻黃湯發汗。則陽氣得泄，陰血不傷。所謂奪汗者，無血也。不發汗，陽氣內擾，陽絡傷則衄。血是奪血者，無汗也。若用麻黃湯再汗，液脫則斃。

矣。言不發汗因致衄，豈有因致衄更發汗之理乎？觀少陰病無汗而強發之，則血從口鼻而出，或從目出，能不懼哉！愚故亟爲校正，恐誤人者多耳。

太陽病脈浮緊發熱身無汗自衄者愈。

汗者心之液，是血之變，見于皮毛者也。寒邪堅斂于外，腠理不能開發，陽氣大擾于內，不能出玄府而爲汗，故逼血妄行而假道于肺竅也。今稱紅汗，得其旨哉。

衄家不可發汗，汗出必額上脈緊急，目直視不能眴，不得眠。

太陽之脈起自目內眥上額已脫血而復汗之津液
枯竭故脈緊急而目直視也亦心腎俱絕矣目不轉
故不能眴目不合故不得眠

脈浮緊者法當身疼痛宜以汗解之假令尺中遲者不
可發汗以營氣不足血少故也

脈浮緊者以脈法論當身疼痛宜發其汗然寸脈雖
浮緊而尺中遲則不得據此法矣尺主血血少則營
氣不足雖發汗決不能作汗正氣反虛不特身疼不
除而亡血亡津液之變起矣○假令是設辭是深一
層看法此與脈浮數而尺中微者同義陽盛者不妨

發汗變症惟衄衄乃解矣。陰虛者不可發汗。亡陽之變恐難爲力。

太陽與陽明合病。喘而胸滿者。不可下。麻黃湯主之。三陽俱受氣于胸中。而部位則屬陽明。若喘屬太陽。嘔屬少陽。故胸滿而喘者。尙未離乎太陽。雖有陽明。可下之症。而不可下。如嘔多。雖有陽明。可攻之症。而不可攻。亦以未離乎少陽也。

陽明病脈浮無汗而喘者。發汗則愈。宜麻黃湯。

太陽有麻黃症。陽明亦有麻黃症。則麻黃湯不獨爲太陽設也。見麻黃症卽用麻黃湯。是仲景大法。

右論麻黃湯脈症

太陽病十日已去脈浮細而嗜卧者外已解也設胸滿脇痛者與小柴胡湯脈但浮者與麻黃湯

脈微細但欲寐少陰症也浮細而嗜卧無少陰症者雖十日後尙屬太陽此表解而不了了之謂設見胸滿嗜卧亦太陽之餘邪未散兼脇痛是太陽少陽合病矣以少陽脈弦細也少陽爲樞樞机不利一陽之氣不升故胸滿脇痛而嗜卧與小柴胡和之若脈浮而不細是浮而有力也無胸脇痛則不屬少陽但浮而不大則不涉陽明是仍在太陽也太陽爲開開病

反閤故嗜卧與麻黃湯以開之使衛氣行陽太陽仍
得主外而喜寤矣與太陽初病用以發汗不同當小
其制而少與之

右論麻黃湯柴胡湯相關脈症

麻黃湯

麻黃 二兩去節

桂枝 二兩

甘草 炙一兩

杏仁 七十

個去尖

水九升先煮麻黃減一升去沫內諸藥煮二升半溫服
八合覆取微似汗不須啜粥餘如桂枝法而論之
麻黃色青入肝中空外直宛如毛竅骨節狀故能旁

通骨節除身疼直達皮毛爲衛分驅風散寒第一品藥然必藉桂枝入心通血脈出營中汗而衛分之邪乃得盡去而不留故桂枝湯不必用麻黃而麻黃湯不可無桂枝也杏爲心果溫能散寒苦能下氣故爲驅邪定喘之第一品藥桂枝湯發營中汗須啜稀熱粥者以營行脈中食入于胃濁氣歸心淫精于脈故耳麻黃湯發衛中汗不須啜稀熱粥者此汗是太陽寒水之氣在皮膚間腠理開而汗自出不須假穀氣以生汗也

一服汗者停後服汗多亡陽遂虛惡風煩躁不得眠也